

■ COLUMNA

Tranteren

DA FLAVIA HOBI*

Durant quests dis particulars causa il coronavirus pudess ins vegnir sin l'idea da dumbrar las chavas dal palantschieu sura. E sch'ins è a fin pudess ins cumenzar da nov perquai ch'ins ha forse sa sbaglià cun dumbrar. U ch'ins pudess reflectar pli intensiv davart citats e plects sabis – sabientschas davart entschattas e fins.

Etuttenina sas ti: Igl è temp da cumenzar insatge nov e da fidar a la magia dad in'entschatta.» In citat che steva in mument sin in chalender gist sur nossa tualetta. Per laschar reflectar nus u noss hosps durant liquidar las fattschentas davart l'atgna vita, per forse effectuar in patratg – e gea, tgi na brama betg mintgatant per muments magics?

Curaschi stat al cumenzament da l'agir, ventira a la fin» – legev'jau lura pli tard avant ch'ir sin tualetta. In citat che lascha medemamain ponderar davart muments magics e davart il fatg ch'agir dovra per part propi curaschi. Curaschi, che cumenza cun in patratg, sco il fatg che



uschè bler cumenza cun in patratg.

Ma quant savens èn ins cun il patratg, avant ch'el è ponderà a fin, gia tar in proxim (malgrà ch'jau ma sent gist in il flow cun scriver ves jau l'ura che ma regorda ch'jau stuess curren giu en pastrign per prender or il resti e metter si ina nova maschina) u insanua en las nivlas? Jau sun ina da quellas, ed i fa mintgatant era bain da siemiari enturn – da siemiari duess ins la fin finala gea mai emblidar.

Jau ta giavisch dapli vita en il temp», m'ha ina persuna perduta giavischà per la midada da l'onn. Entschattas e fins èn sin ina moda e maniera gea era muments da la vita, muments che dattan vita a la vita, muments che laschan viver il temp. E dal rest, il

temp è atgnamain mai a fin. Nus giain, il temp dentant resta – «Nicht die Zeit vergeht, wir vergehen» (na, quai na steva betg sur nossa tualetta).

Cura sa repeta ina fin, cura è in'entschatta a fin, cura è ina fin tuttina betg u mai a fin (p. ex. cun lavar vestgadira), pia na sa ina fin mintgatant betg medemamain esser in cumenzament? Tge sa chatta insomma tranter la fin e l'entschatta? E tgi di ch'i saja propi a fin suenter la mort? Ni la tatta ni il tat m'han gia telefonà giu da tschiel per dir ch'i saja lura propi a fin.

Dumondas senza fin, ed i ma para be l'entschatta. Sco tar uschè bler – nossa savida ha cunfins, e dapli ch'ins sa, pli vasts paran era da daventar quels cunfins envers il nunencunoschent. En quel senn giavisch jau a tuttas e tuts dapli vita en il temp, curaschi per entschattas ed – independentamain d'entschattas, fins u in ni l'auter – muments magics, senza (cun)fins.

* Flavia Hobi ha studegià pedagogia e rumantsch a l'Universitad da Friburg. Actualmain lavura ella sco docente da rumantsch per differentas instituziuns, sco redactura tar il tele-text e vi dad auters projects.